

11-bob. Byudjet tashkilotlarining byudjetdan tashqari jamg'armalari daromadlari

60-modda. Byudjet tashkilotining rivojlantirish jamg'armasi daromadlarini shakllantirish

Byudjet tashkilotining rivojlantirish jamg'armasi daromadlari:

hisobot choragining so'nggi ish kuni oxirida xarajatlar smetasi bo'yicha tejalgan mablag'lar, kapital qo'yilmalarni moliyalashtirish uchun nazarda tutilgan mablag'lar bundan mustasno;

faoliyat ixtisosligi bo'yicha tovarlarni (ishlarni, xizmatlarni) realizasiya qilishdan olingan daromadlar;

byudjet tashkiloti balansida turgan mol-mulkni ijaraga berishdan olingan mablag'larning bir qismi;

belgilangan tartibda byudjet tashkilotlari tasarrufida qoldiriladigan mablag'lar;

homiyligidan olingan mablag'lar hisobidan shakllantiriladi.

Byudjet tashkilotining rivojlantirish jamg'armasiga byudjet tashkilotlarining tovarlarni (ishlarni, xizmatlarni) realizasiya qilishdan olingan daromadlari tovarlarni (ishlarni, xizmatlarni) realizasiya qilishdan tushgan tushumlar va ularni ishlab chiqarish bo'yicha xarajatlar o'rtasidagi ijobiy farq sifatida aniqlanadi.

Qarang: Mazkur Kodeksning 44, 61 — 63-moddalari, O'zbekiston Respublikasi Adliya vazirligi tomonidan 15.12.2014 yilda 2634-son bilan ro'yxatdan o'tkazilgan, O'zbekiston Respublikasi moliya vazirining 14.11.2014 yildagi 74-sonli buyrug'i bilan tasdiqlangan Byudjet tashkilotlari va byudjet mablag'lari oluvchilarning xarajatlar smetasi va shtat jadvallarini tuzish, tasdiqlash va ro'yxatdan o'tkazish tartibi to'g'risidagi nizomning 4 va 5-boblari.

61-modda. Tibbiyot tashkilotlarining moddiy rag'batlantirish va rivojlantirish jamg'armasi daromadlarini shakllantirish

Tibbiyot tashkilotlarining moddiy rag'batlantirish va rivojlantirish jamg'armasi daromadlari:

tibbiyot tashkilotiga ajratiladigan byudjet mablag'lari umumiy hajmining 5 foizigacha bo'lgan miqdorda byudjetdan ajratiladigan mablag'lar;

faoliyat ixtisosligi bo'yicha tovarlarni (ishlarni, xizmatlarni) realizasiya qilishdan olingan daromadlar;

hisobot choragining so'nggi ish kuni oxirida xarajatlar smetasi bo'yicha tejalgan mablag'lar, kapital qo'yilmalarni moliyalashtirish uchun nazarda tutilgan mablag'lar bundan mustasno;

tibbiyot tashkiloti balansida turgan mol-mulkni ijaraga berishdan olingan mablag'larning bir qismi;

belgilangan tartibda byudjet tashkilotlari tasarrufida qoldiriladigan mablag'lar;

homiyligidan olingan mablag'lar hisobidan shakllantiriladi.

Tibbiyot tashkilotlarining moddiy rag'batlantirish va rivojlantirish jamg'armasiga tibbiyot tashkilotlarining tovarlarni (ishlarni, xizmatlarni) realizasiya qilishdan olingan daromadlari tovarlarni (ishlarni, xizmatlarni) realizasiya qilishdan tushgan tushumlar va ularni ishlab chiqarish bo'yicha xarajatlar o'rtasidagi ijobiy farq sifatida aniqlanadi.

Qarang: Mazkur Kodeksning 44, 60 va 81-moddalari.

62-modda. Vazirliklar, davlat qo'mitalari va idoralarning byudjetdan tashqari jamg'armalari daromadlarini shakllantirish

Vazirliklar, davlat qo'mitalari va idoralarning byudjetdan tashqari jamg'armalari daromadlari belgilangan tartibda davlat bojlari, yig'imlar va soliq bo'lmagan to'lovlar, ma'muriy jarimalar hamda moliyaviy sanksiyalardan ajratmalar hisobidan shakllantiriladi.

Qarang: Mazkur Kodeksning 44 va 82-moddalari.

63-modda. Byudjet tashkilotlarining byudjetdan tashqari mablagʻlarini undiriladigan toʻlovlar hisobidan shakllantirish

Byudjet tashkilotlari tomonidan byudjetdan tashqari mablagʻlar:

oʻquvchilar va tarbiyalanuvchilar davlat maktabgacha taʼlim muassasalarida, umumtaʼlim maktablarining kuni uzaytirilgan guruhlarida, maktab-internatlarda, ixtisoslashtirilgan olimpiya zaxiralari maktab-internatlari va boshqa taʼlim muassasalarida saqlab turilganligi uchun;

(63-moddaning birinchi qismi ikkinchi xatboshisi Oʻzbekiston Respublikasining 2018 yil 23 iyuldagi OʻRQ-486-sonli Qonuni tahririda — Qonun hujjatlari maʼlumotlari milliy bazasi, 24.07.2018 y., 03/18/486/1559-son)

oʻquvchilar bolalar musiqa va sanʼat maktablari hamda maktabdan tashqari taʼlim muassasalarida taʼlim olganligi uchun;

oliy va oʻrta maxsus, kasb-hunar taʼlimi muassasalarida taʼlim olganlik uchun;

stasionar davolash-profilaktika muassasalarida davolanayotganlar tarkibi ovqatlanishi uchun;

qonun hujjatlariga muvofiq boshqa turdagi undiriladigan toʻlovlar hisobidan shakllantiriladi.

Undiriladigan toʻlovlarning miqdorlari, ularni kiritish va ulardan foydalanish tartibi, shuningdek undiriladigan toʻlovlar boʻyicha imtiyozlar qonun hujjatlari bilan belgilanadi.

Qarang: Mazkur Kodeksning 44-moddasi.